

Kultureqarnermut Naalakkersuisoq Doris Jakobsenip - februaarip 15-iat  
2017-imi Katuap 20-iliineranut atatillugu - meeqqanut oqalugiaataa

***Asasakka meeqqat – Asasakka tamassi!*** 😊

Ullumikkut Katuaq, Kalaallit Nunaata tamarmi Kulturikkut Illorsua  
inuuissiorluni ulloq naallugu unnugulu nalliuttorsiorpoq.

Siullermik meeqqanut aliikkutassaqaassaaq – taamaammallu maanna  
meeqqat maani Katuamiittut apererusuppassi:

Kinaana inuuissiortoq?

Katuaq qassiliiva?

Katuaq sunaava?

Susoqarsinnaava Katuami?

**Katuaq pilluarit!**

Maanna illorsuaq ukiut 20-t pigereerparput, KIKKUT TAMARMIK  
iserfigisinnaasaat: meeqqat, inuusuttut, anaanakkut ataatakkut,  
aanaakkut aataakkut allallu inersimasut.

Maani filmit - imaluunniit assit, ilusilersukkat qalipakkalluunniit  
takusinnaasarpavut.

Isiginnaartitsisut, qitittut, imaluunniit klovnit, akorsillaqqissut  
angakkuartartullu maani naapitassaasarput.

Nipilersuutillu assigiinngitsorpassuit tusarnaarsinnaasarlugit.

Illorsuarli manna aamma isersimaarusaarfigiinnarneqarsinnaasarpog!  
Imaluunniit ilikkagaqarniarluni allanilluunniit suliassaqarluni soorlu  
ataatsimiigiarluni.

Immaqa maanga neriartoqatigiittoqarsinnaavoq - imaluunniit Katuamut  
kammalaatit naapigiarlugit!

Maanna illorsuarmi maani ukiuni 20-inngortuni inuit nunatsinni sumiiffiinit tamaneersut isertarput.

Meerarpassuit inersimasorpassuillu maani isiginnaartitsisarfirmi isiginnaartitsinikuupput aamma.

Inuit nunat allaneersut aggertarput pikkoriffimminnillu aamma takutitsillutik.

*Taamaalilluni – illorsuup takusai amerlaqaat oqaatsillu  
ASSIGIINNGITSORPASSUIT tusaanikuullugit!*

Aamma Kulturikkut illorsuup avataani assigiinngitsunik pisoqartarpoq: Arpattartut maanngaanniit aallariarlutik maanga apuuttarput.

Erfalasut assigiinngitsut erfalatinneqarsimapput - aamma assersuutigalugu silataani apummi nanerussat ikumatinneqartarput.

Allaat pappiaqqat ikummarissut pavungarsuaq qangattartinneqarsimapput,

assit illorsuup silataanut seqqertinneqarnikuupput , silamilu nipilersortoqartarluni.

Arlaleriarlunilu qummoroortangaatsiartoqarsimavoq.

Ukiuni 20-ini Kalaallit Nunaanni Kulturikkut Illorsuaq nuannersunik pisorpassuaqarpoq susassarpassuaqarlunilu - inuppasuarnut nuannisartitsisunik:

Misigisarpasuarnut, pisorpassuarnut QUJANAQ!

Kisianni suli soorunami pisussarpassuaqarpoq; - Meeqqat inersimasullu tamarmik - ukioq manna ukiuniluunniit tullinguuttuni amerlasuuni - illorsuup iluani silataaniluunniit pisussanik siunnersuuteqarsinnaapput..

*Isumassarsiatsialaat atorfissaqartittuaannarpavut!*

Taamaammat Katuami pisusaaq ILLIT kissaatigisat eqqarsaatigiuk –  
sulisunullu maaniittunut inersunulluunniit arlaannut oqaluttuariuk, taava  
imaassinnaasoq ullut arlaanni piviusunngortoq.

Immaqa angerlarsimaffinni silamiluunniit aliikkutarisinnaasannik illit  
nammineq nutaanik isumassarsiaqarsinnaavutit, immaqa maani  
illorsuarmi misiginikuusannik isumassarsisinnaavutit?

Tassa taakku kulturikkut illorsuarmi; naapinnissamut, nuannersunik  
misigisaqarnissamut, nutaatut, kusanartutut pissanganartutulluunniit  
atorneqarsinnaapput - taamaalilluta immaqa nutaanik  
misilittaarusulissaagut!

Taamaammat Kalaallit Nunaanni Kulturikkut Illorsuaq tamatta  
paarilluartariaqarparput, suli ukiorpassuit maaniissinnaaniassagatta!

Taamaammallu massakkut tamatta Kulturikkut Illorsuaq pillugu  
NIPITUUMIK HURRAARTUSSAAGUT:

***Katuaq inuummersorli: - Hurra - hurra - HURRAAA!***